

1608/38.

Posita Causa ^{proposita} ^{efficienti} ^{pos.}
non impedita in actu
- Rels Causa - Rels Effectus -

LOGICA.

Synopsis

de terminis - 3
propositio -
varis argumentis ^{formulis}
cautiones 3
De Syllogismo conditionali
disjunctivo
copulativo
prothetico

ACI



101

GILBERTI BUCHANANI

LOGICA;

**In Usum Juventutis Phi-
losophiam Studentis.**



L O N D I N I:


**Venalis apud Officinam T. WALLER Biblio-
polæ in Medio Templo.**

M.DCC.XXXVII.

GILBERTI BUCHANANI



In Utrum Jurisprudentie Philo-
sophiam Studentis



L O W D A N A

M D C C X X V I I
Vendit apud Officinam T. W. W. B. B. B.
pols in Medio Templo

LOGICA.

Disciplinis aliis Philosophicis ideo præmitti solet *Logica*, ut hujus ope rectius cogitare valeamus, et cogitationes debito ordine disponere : atque hinc est quod dici soleant intellectus Operationes Logicæ *Objectum*, sive id circa quod *Logica* versatur.

Hoc ut melius intelligatur, sciendum duplicem a Philosophis communiter adscribi Menti humanæ facultatem, alteram *Voluntatem* dictam, quâ quod bonum ipsi videtur, Mens prosequitur, quod tanquam malum repræsentatur fugit; alteram *Intellectum*, quæ circa rerum naturas cognoscendas, et verum eruendum, idque a falso discernendum versatur.

Facultatis hujus Operationes, alias innumeræ, ad certas classes reduci solent : hæ a Logicis recentioribus duæ statuuntur, *Apprehensio* scilicet et *judicium*.

Apprehensionis nomine intelligitur *nuda rei perceptio* sive *repræsentatio*, ubi scilicet per ideam objecti in mente vicariam res menti tanquam præsens sistitur, dum interea nulla ea de re fertur mentis sententia.

Judicium dicitur, *illa mentis operatio, qua de Ideis inter se comparatis mens sententiam fert* : Mentis operatio hæc Ideas duas prius formatas supponit, ut post institutam inter eas Comparationem, pro ipsarum convenientia vel discrepantia, de iis (vel quod eodem redit, de objecto harum Idearum ope ipsi repræsentato) mens determinet, seu sententiam ferat, an scilicet duæ istæ Idææ sint ejusdem rei repræsentamina, vel an res sit eadem quæ per duas istas Ideas repræsentatur.

Subdividunt recentiores *judicium* in *noeticum* et *dianoeticum* : Illud est, quo de Ideis immediate inter se comparatis fertur mentis sententia, pro scilicet illarum convenientiâ vel discrepantiâ, quæ ex mero Idearum harum intuitu cernitur : hoc, quo de Idearum convenientiâ vel discrepantiâ determinat mens, prout utriusque convenientiam percipit cum Idea tertia ; aut alterius cum ea convenientia, alterius ab eadem discrepantia : in judicio quippe dianoetico utraque Idea cum eadem tertia comparatur, ut hujus interventu sententiam ferre valeat mens de duabus istis Ideis, de quarum convenientiâ vel discrepantiâ vel nihil, vel non ita certo determinare valebat.

Pro diversis hisce Operationum intellectus Classibus, distribui solet *Logica* in partes tres, quarum *Prima* de *Apprehensione* ; *Secunda* de *Judicio noetico* ; *Tertia* de *Judicio dianoetico* sive de *discursu* tractat : addunt quidam partem *Quartam* (quam dicere malunt alii *Appendicem*) de *Methodo*, debito scilicet cogitationum ordine aut dispositione.

Cum autem animus non in hisce hic loci fusiùs insistere, nec aliud intendatur, quam ut

Tyronum

Tyronum gratiâ breviusculam demus synopsis illorum, quæ maxime necessaria videntur intelligendis iis, quæ in systemate Logico, et aliis Philosophiæ partibus, postea (*οὐν θεω*) tradenda veniunt ; cumque illud commodius assequi nequeamus, quam si prælibanda dederimus quædam de signis externis prædictarum intellectus Operationum : Compendiolum hoc proportionate ad prædictas tres Logicæ partes, tribus complectimur capitibus, quorum *primo* nonnulla tradituri sumus de *termino*, signo utpote *Apprehensionis* externo. *Secundo*, de *Propositione* five *Enunciatione*, signo externo *Judicii* noetici. *Tertio*, de *Variis Argumentandi formulis*, quod sint hæ signa externa *Judicii* dianoetici, vel, si visum fuerit, dicas discursus.

C A P. I.

De Termino.

Descrberi solet *Terminus* cum respectu ad Propositionem, quod sit, *quicquid* esse potest propositioni *subjectum* vel *prædicatum* : quia autem descriptio hæc *intellectam* supponit propositionis naturam, illius vice hanc surrogant nonnulli, quod *Terminus* sit, *quicquid* dici potest de aliquo, vel de quo aliquid dici potest.

Varias afferunt Summulistæ *Termini* divisiones, ex quibus selectas quasdam præ aliis notandas recensebimus.

Dividere solent *Terminum* *primo* in *vocalem*, qui voce effertur, et *Scriptum*, qui literis exaratur ; addi a quibusdam solet (licet non adeo proprie, dum de Idearum signis externis est *Sermo*) *mentalis*, qui mente concipitur.

Dividunt *secundo* in *significativum*, qui præter Ideam quam in mente excitat *sui ipsius* (soni nimirum quem edit, si voce proferatur, literarum quibus constat, si scripto committatur) aliam habet annexam, ut in his, *Glasgva, Londinum*, et istiusmodi; et *non significativum*, qui præter Ideam quam excitat *sui ipsius*, nullam aliam habet annexam, quales innumeri a quovis cudi possunt.

Celebris est Termini divisio *tertia* in *universalem* et *singularem*; divisio hæc vix probe intelligi poterit ante traditam in systemate logico doctrinam, de *universalibus*, cum nomina hæc sortiantur Termini propter Ideas *universales*, et *singulares* ipsis alligatas: neglecta utcunque in his ut et sequentibus aliis definitionis accuratioris AKPIBEIA, *Terminus universalis* is dicitur, qui pluribus *sigillatim* significandis est applicabilis, ut in exemplis vulgatis *Homo, Equus*.

Terminum singularem appellant, qui unum tantum significat: illud autem fieri volunt, vel *determinate* vel *indeterminate*: *Terminum singularem* unum quid, idque *determinate* significantem dicere solent *individuum determinatum*.

Determinari autem volunt *individuum*, vel *primo*, nomine proprio, ut, cum nomine hoc *Adamus* significatur *primus Homo*. *Secundo*, nomine communi per antonomasiam sumpto proprio, ut in exemplo isto, *Orator*, dum de *Cicerone* intelligitur. *Tertio*, nomine communi pro nomine demonstrativo restricto, ut in exemplo, *hic Homo*; vel *quarto* per periphrasin, ut cum pro *Paulo* dicitur *Gentium Apostolus*.

Terminum singularem, unum quid, sed *indeterminate* significantem (ut in Exemplo *aliquis Homo*) appellare solent *individuum vagum*, five inde-

indeterminatum, quod licet uni tantum significando intendatur, incertum tamen relinquatur quodnam sit illud unum.

Dividunt *quarto* in *univocum* et *equivocum*; terminus *univocus* dicitur, qui pluribus significandis secundum eandem ideam est *applicabilis*, ut, in allatis superius exemplis *terminorum universalium*, *Homo*, *Equus*.

Terminus *equivocus* dicitur, qui plura significat quibus idem imponitur nomen, sed secundum ideas diversas huic nomini sive termino alligatas.

Terminum equivocum subdividunt: quod alius sit *casu*, absque nimirum certa quavis ratione, ut in hoc exemplo *Gallus*, dum applicatur significando et homini nato in Galliarum regno, et *Gallo Gallinaceo*: alius *Consilio*, ex consideratione scilicet respectus alicujus inter rem unam et aliam, quarum utraque ob certam rationem eodem nomine notatur: ita dicitur, non tantum *Corpus sanum*, sed et *sanus aer*; *sanum medicamentum*, *sanus arteriæ pulsus*, propter scilicet respectum quem ad invicem habent *causa* et *effectus*, *signum* et *signatum*, et hujusmodi; ille dicitur terminus pure *equivocus*, hic *analogus*.

Dividunt *quinto* in *abstractum* et *concretum*; ille describi solet, qui *adjunctum* aliquod vel quasi *adjunctum* absolute significat: hic, qui significat subjectum vel quasi subjectum cum adjuncto: quicquid sit de descriptionibus his de quibus non est quod multum solliciti simus, modo res ipsa intelligatur, prioris generis exempla sunt, *Doctrina*, *Pietas*, *albedo*, *nigredo*; posterioris, *Doctus*, *Pius*, *albus*, *niger*.

Dividunt *sexto* in *Complexum* et *Incomplexum*: Illum subdividentes, quod alius sit solis vocibus

bus complexus, non sensu, ut in hoc, *Serenissimus magnæ Britanniae Rex Georgius*; alius sensu, non vocibus, ut *Doctus, Triste*; alius et vocibus et sensu, ut in his, *Homo doctus* seu *Doctrinâ præditus, triste spectaculum*.

Ex dictis de *Termino Complexo* facile colliget quivis quid intelligi soleat nomine Termini *incomplexi*, cujus afferunt exempla *Petrus, Paulus, &c.*

Tradi solent plurima de Termini *suppositione*, de qua notâsse sufficiat, dum dicitur Terminus pro hoc vel illo supponere; non aliud intelligi quam quod Terminus iste pro hoc vell illo accipiat.

Suppositio ita intellecta dividitur in *materialem*, et *formalem*: illa dicitur, ubi Terminus pro se sumitur, id est, pro literis et syllabis quibus constat, si scripto committatur; vel pro sono quem edit, si voce efferatur; ut in exemplis his, *Annus, Dies*, in propositionibus sequentibus *Annus* est dissyllabum, *Annus* constat quinque literis, *Dies* est vox leniter sonans.

Suppositio dicitur *Formalis*, quando Terminus pro aliquo a se diverso accipitur, ubi scilicet præter Ideam sui ipsius aliam sibi alligatam in mente excitat, ut in exemplis iisdem, *Annus, Dies*, in propositionibus his, *Annus distinguitur in quatuor Tempestates, Dies constat spatio viginti quatuor horarum*.

Suppositio iterum *Formalis*, propria est, vel *Impropria*: prioris Exemplum est in propositione hac, *Aristides fuit Justus*: posterioris in hac, *Herodes fuit Vulpes*.

Sed de his satis. *Progredimur ad*

C A P. II.

De Propositione.

Propositio dicta etiam Enunciatio est Judicii noetici Interpres, sive signum externum, quo *Judicium noeticum* a mente formatum aliis manifestamus: et describi solet, *oratio affirmans* vel *negans aliquid de aliquo*: accuratius, conformiter ad prius dicta, describi poterit, *oratio significans mentis sententiam de Ideis immediate inter se comparatis.*

Ex superius notatis de *Judicio noetico*, patet ad Propositionem signum ipsius externum tria requiri. Primo, Terminum significantem illud cui aliquid convenire, vel non convenire Judicamus, atque hoc *subjectum* appellatur. Secundo, Terminum significantem illud quod Judicamus alicui convenire, vel non convenire: hoc autem *prædicatum* dicitur, sive *attributum*. Tertio, Denique signum ipsius sententiæ mentis, de harum convenientiâ, vel discrepantiâ; estque in propositionibus affirmantibus (de quibus postea) verbum substantivum *est*; in negantibus idem verbum substantivum, cum notâ negandi *non* præfixâ, vel alteri, (uti postea dicetur) Termino, vel quantitatis notæ, inclusa: signum hoc externum, quo (ut dictum) significatur ipsa mentis sententia, dici solet *copula*, quod in propositionibus affirmantibus sustineri poterit; an autem in negantibus ita proprie dici possit *copula*, alibi remittimus inquirendum.

Tria hæc ad Propositionem requisita cernere est in exemplo hoc, *Virtus est laudanda*; in qua pro-

propositione *virtus est subjectum; laudanda prædicatum; est Copula.*

Advertendum tamen non semper tria hæc explicite poni in Propositione; sæpe enim Propositionis integra est, ubi vel *subjectum*, vel *prædicatum*, vel *utrumque verbo* involvitur; adeo ut Propositionis, interdum duabus, interdum unica voce constet; ut in his, *incumbo studiis, Petrus legit, scribo*: ubi in Primo implicite tantum ponitur *subjectum* verbo utpote involutum; in Secundo *prædicatum*; in Tertio utrumque: tria autem illa, quæ ad Propositionem requiruntur, cernere erit in Propositionibus istis, modo resolvantur, quod facile fieri potest, hunc in modum, *Ego sum incumbens studiis, Petrus est legens, Ego sum scribens.*

Non tantum percipi poterit illud in verbis his et similibus, quæ *adjectiva* a Logicis dici solent, atque ornatus et compendii gratia usurpantur, quæque facile resolvantur in *nomen*, vel (si cum Grammaticis loqui velimus) *participium* et *verbum substantivum*; sed et ubi non est aliud verbum quam substantivum, nonnunquam supprimitur *subjectum*, ut in hac, *sum defessus*, ubi suppressum intelligitur *subjectum Ego.*

Interdum etiam verbo *est* involutum reperitur *prædicatum*: sciendum tamen hoc in casu *est* eodem sensu intelligi ac *existit*; et resolvendum in *nomen existens*, et idem verbum substantivum *est*, ut in hac, *Roma est*, quæ idem valet ac *Roma existit*, et ut plena sit ipsius resolutio, *Roma est existens.*

Observandum præterea non ex Terminorum situ, sed Propositionis sensu discernendum *prædicatum*

dicatum a subiecto; ut patet in hoc exemplo, omnium malorum parens est Ebrietas.

Propositio patitur varias divisiones, quarum præcipuas, quantum ad præsens institutum, paucis perstringemus.

Dividitur primo in *affirmantem* et *negantem*, consequenter ad Judicia quorum sunt propositiones signa externa: ubi enim mens, ob convenientiam, quam inter duas Ideas percipit, fert sententiam esse has ejusdem objecti repræsentamina, vel (quod eodem redit) objectum representatum per has duas Ideas esse unum et Idem; Oratio significans hujusmodi Judicium, dicitur *Propositio affirmans*, qualis est hæc, *Vita sincere pia ducit ad Beatitudinem*: ubi autem ob discrepantiam, quam percipit mens inter duas Ideas formatas, fertur sententia, non esse has ejusdem objecti representamina, Oratio hujusmodi Judicii Interpreter, dicitur *Propositio negans*, exemplo hujus, *Vita flagitiosa non ducit ad Beatitudinem*.

Fit autem *Propositio negans* vel primo, ubi ponitur nota negandi *non*, immediate ante verbum Substantivum, ut in hac, *mendacium non est Deo acceptum*. Vel secundo, ante verbum adjectivum cui involvitur substantivum cum nomine, ut in superius allato exemplo, *Vita flagitiosa non ducit ad Beatitudinem*. Vel tertio, quando negandi particula in ipsa quantitatis nota continetur, ut, *nullum vitium est Deo acceptum*. Addi poterit quarto cum nota negandi ponitur ante notam quantitatis *omnis*, *aliquis*, &c. ut, *non omnis doctus est pius*, cui æquipollet hæc, *aliquis doctus non est pius*.

Hic autem cavendum ne credatur *Propositio negans*, ubi per superadditam negandi notam

tollitur negatio prior, ut in hac, *nulla Transgressio legis divinæ non meretur mortem æternam*, quæ huic æquivalet, *omnis Transgressio Legis divinæ meretur mortem æternam*.

Dividitur *secundo* in *Veram* et *Falsam*: Divisio hæc ut melius intelligatur, vulgatam veritatis distinctionem in *Ethicam* et *Logicam* (neglecta alia, quæ metaphysica appellatur, tanquam non hujus loci) paucis attingemus; *Veritas Ethica* intelligitur, conformitas sermonis (vel signorum externorum quorumcunque, quibus animi cogitata aliis manifestamus) cum Judicio a mente formato; ubi scilicet quis utitur sermone, aut aliis cogitationum signis externis secundum animi sensum, non saltem contra ac Judicat.

Veritas Logica est Conformitas Judiciorum, vel etiam Propositionum (vel signorum quorumcunque externorum, quibus latas a mente sententias aliis manifestamus) cum rebus ipsis; ubi nimirum ita quis Judicat aut loquitur, vel signo quovis alio externo mentem suam alteri aperit, prouti revera res se habet: unde patet fieri posse, ut Propositio Logice vera, sit interea Ethice falsa, seu mendacium; et e contra, Propositio Ethice (sive sensu Ethico) vera, sit Logice (sive sensu Logico) falsa, quod Exemplis viva voce dandis manifestum fiet.

Prædictæ duæ divisiones a *Qualitate* Propositionis desumi dicuntur: *Ratione Quantitatis*,

Dividere solent Logici Propositionem *tertio* in *universalem*, *particularem*, *singularem*, et *indefinitam*: quodque in membris his explicandis Terminis quibusdam utantur Logici, quia Tyronibus non facile intelligi possunt,

Advertendum in *Idea* vel *Termino universali* duo occurrere notanda, *Comprehensionem* scilicet

et *Extensionem* ; dictum in *Idea* quandoquidem ratione hujus *Termino universali* annexæ, ipsi *Termino* hæc tribuuntur: nomine *Comprehensionis* intelligitur *Collectio attributorum*, quæ ita in *Idea* continentur, ut nullum demi possit, quin ipsa pereat, ut in *Idea Corporis* substantia *Extensa*: nomine *Extensionis* *Ideæ* vel *Termini Universalis*, intelligunt communiter subiecta (quæ et *Inferiora* dicuntur) quibus repræsentandis vel significandis *Idea* vel *Terminus universalis* est applicabilis ; magis autem arridet, quod dicatur *Extensio, applicabilitas Ideæ* vel *Termini universalis ad varia illa subiecta* sive *Inferiora*: his notatis, ad membra *Divisionis* modo dictæ describenda progredimur.

Propositio universalis dicitur, cujus subiectum est *Terminus universalis* in tota ipsius *Extensione* (vel, ut ab aliis dici solet, *Latitudine*) sumptus: Dictum cujus subiectum, &c. quod ab hoc non a prædicato desumatur *Propositionum Quantitas*: sunt autem notæ universalitatis *omnis, nullus, &c.* ut in his et similibus *Exemplis, omne vitium a Deo damnatur; nulla vera virtus Improbo convenit.*

Propositio Particularis dicitur, cujus subiectum est *Terminus universalis* in parte tantum suæ *Extensionis* sumptus; hujus notæ sunt *aliquis, quidam*, ut in his, *aliquis, qui se profitetur Christianum, est Idololatra.*

Propositio singularis est, cujus subiectum est *Terminus singularis*, qui scilicet unum tantum significat, idque determinate, ut, *Georgius Buchananus merito habebatur Poetarum sui sæculi Princeps.*

Propositio denique Indefinita dicitur, cujus subiectum est *Terminus universalis* nulla quanti-

tatis nota affectus : ubi nimirum non Expresse significatur utrum subjectum (quem Terminum universalem diximus) sumatur in tota an parte tantum suæ Extensionis, ut in Exemplis his, *Creatura a Deo dependet, Homo est musicus*: num autem Propositionibus hujusmodi dentur in mente Judicia, quæ etiam dici possint Indefinita, hujus loci non est inquirere.

Divisionem hanc, quæ dici solet a Propositionis Quantitate desumi, ut et primam a Qualitate (in Affirmantem et Negantem) eo lubentius attigimus, quod harum notitia omnino sit necessaria syllogismorum doctrinæ, quæ postea tradenda venit, rite intelligendæ: quem etiam in finem vocalibus quatuor *a, e, i, o*, designare solent Logici Propositiones, quarum subjecta sunt universales Termini, nota quantitatis affecti, (tradentes interea generales quasdam regulas de Propositionibus Singularibus et Indefinitis, quas hic loci consulto omittimus;) ut *a* notet universalem affirmantem; *e* universalem negantem; *i* particularem affirmantem; *o* particularem negantem; secundum vulgatum istud distichon.

Afferit *a*, negat *e*, sed universaliter ambo.

Afferit *i*, negat *o*, sed particulariter ambo.

Facile etiam ex divisionibus his et superius traditis, de Termini universalis Extensione capere quivis poterit, quæ dicuntur *axiomata*: Propositiones duas generales, quibus tanquam fundamentis innititur Doctrina syllogistica, quæ hic loci commode satis tradi posse videntur.

Axioma primum. *Quodcunque attributum, sive prædicatum, vere dici potest de subjecto, Termino universali in tota ipsius Extensione sumpto, idem dici*

dici poterit de omnibus sub illius extensione contentis, vel (quod eodem redit) de omnibus illius inferioribus : ut quia vera est Propositio hæc, omnis Homo est mortalis; ideo etiam veræ sunt istæ, Petrus est mortalis, Paulus est mortalis, et sic de cæteris hominibus omnibus; atque hoc est quod vulgo dici solet, dictum de omni.

Axioma secundum. *Quodcunque attributum, five prædicatum, vere negari potest de subiecto, Terminu universalis in tota ipsius extensione sumpto, idem etiam negari potest de omnibus sub illius extensione contentis, five de omnibus illius subiecti inferioribus : ut quia vera est Propositio hæc, nullum peccatum est Deo acceptum; ideo etiam veræ sunt hæc, mendacium non est Deo acceptum, intemperantia non est Deo accepta, et sic de aliis quibuscunque peccatis absque exceptione; atque hoc est quod dicere solent, dictum de nullo.*

Hic tamen observanda venit, quæ communiter ponitur, distinctio Propositionum universalium, quod illarum quædam intelligendæ sint, quoad genera singulorum, ut in hac, *omne animal fuit in Arca Noë*, ex cuius veritate sequitur veritas Propositionum huiusmodi, *fuit in Arca Noë Homo, fuit Equus, &c.* non autem, *fuit in Arca Noë Petrus, hic equus*; aliæ, quoad singula generum, ut in Propositione hac, *omnis Homo est substantia composita ex mente finita et corpore organico unitis*, ex cuius veritate sequitur harum veritas, *Petrus est substantia composita ex mente finita, &c. Paulus est, &c.* et sic de singulis hominibus.

Observandum etiam in Propositionibus quibusdam, in quibus subiectum est Terminus universalis nota universalitatis affectus, prædicatum

tum five attributum de subiecto enunciari, non sensu *distributivo*, quasi idem prædicatum sigillatim tribui posset singulis sub Termini illius extensione contentis, sed sensu *collectivo*, ubi scilicet de omnibus Termini illius inferioribus collective sumptis, five in numerum unum collectis, dici intelligitur prædicatum, ut in hac, *omnes Apostoli erant duodecim*, ex cuius veritate perperam quis inferet, *Petrus erat duodecim*; *Paulus erat duodecim*.

Hæc fusius hic loci sumus profecuti, quod, ut prius diximus, Doctrinæ syllogisticæ (quam postea tradituri sumus) rite intelligendæ inserviunt. Sed, ut ad Propositionis Divisiones redeamus;

Dividi solet Propositio *quarto* in *simplicem* et *compositam*; atque utriusque afferunt Logici subdivisiones, quas tantum non omittemus.

Propositio *simplex* dicitur, quæ in plures *resolvi nequit*: *Composita*, quæ ex pluribus *simplicibus inter se unitis componitur, in quas iterum resolvi potest*.

Hic tamen advertendum, resolutionem in plures propositiones simplices non intelligi illam, in qua, ob universalitatem subiecti, prædicatum sigillatim dici potest de singulis sub illius Termini extensione contentis; aliter Propositio quævis universalis dicenda foret *composita*; sed resolutionem, quæ ortum ducit ex ipsa partium Propositionis compositione, de qua postea.

Propositionem *simplicem* subdividunt in *Incomplexam*, quæ constat Termino utroque, subiecto scilicet et prædicato incomplexo, qualis est hæc, *omne mendacium est peccatum*: et *complexam*, quæ constat vel subiecto, vel prædicato, vel utroque complexo, ut in his, *nullus aperte flagi-*

flagitiosus est beatus : Petrus est Homo sincera virtute præditus : qui conantur vitia sua celare homines, non effugient conspectum Dei, qui corda novit.

Additamentum cujus gratia complexus evadit Terminus quivis tenens locum subjecti vel prædicati Propositionis ; aliud est *explicativum*, ita dictum, quod alterius explicet et illustret Terminum cui additur, cujusmodi sunt Terminorum singularium additamenta, ut in exemplo sequente, *Alexander filius* (vel qui fuit *filius*) *Philippi Macedonum regis debellavit Persas* ; illa item quæ inserviunt comprehensioni universalis Termini explicandæ, ut in hac, *corpus substantia* (vel quod est *substantia*) *in partes divisibilis, Omnipotenti Deo originem suam debet* : aliud est *restrictivum*, dictum etiam *determinativum*, quod Termini universalis extensionem restringat vel determinet, ut in hac, *omnis peccator fide salvifica ad Christi merita confugiens servabitur*, ubi prædicatum non omnibus peccatoribus, sed solis ad Christi merita confugientibus tribuitur.

Additamentum in Propositionibus complexis *explicativum* involvit propositionem, quæ appellari solet *incidens*, quod in Propositionis principalis finem quasi incidat, ut in superius allato exemplo, *qui conantur vitia sua celare homines, non effugient conspectum Dei, qui corda novit*, ubi Propositio hæc *Deus corda novit*, dicitur *incidens* : *qui conantur vitia sua celare homines, non effugient conspectum Dei*, propositio principalis.

Propositionem *compositam* subdividunt Logici in *explicite* seu *aperte compositam* ; ubi scilicet facile cernitur compositio, et cujus resolutio in plures

plures simplices, ex quibus constat, facilis est et aperta: et *implicite compositam*, seu sensu tantum, ubi nimirum latet compositio, nec facile potest ea in plures Simples resolvi.

Utramque subdividunt in varias species, *explicitè compositam* communiter in sex sequentes, *copulativam, disjunctivam, conditionalem, causalem, relativam, et discretivam*.

Copulativa dicitur, inter cujus partes intercedit conjunctio copulativa, *et, atque, &c.* ut in hac, *Deus est supremus Author et Rector generis humani*: et in hac alia, *mens humana et corpus existent post mundi hujus conflagrationem*: in exemplo priore, eidem subjecto tribuuntur prædicata duo per conjunctionem copulativam; compendii sermonis gratia connexa; in posteriore, prædicatum Idem subjectis diversis similiter connexis tribuitur.

Disjunctivam appellant, inter cujus partes intercedit particula disjunctiva, *aut, vel, &c.* ut in his, *aut Dies est aut nox: omnis Homo est vel probus vel improbus.*

Conditionalis dicitur, cujus partes connectuntur particula conditionalis *si, ut, si mendacium lege divina vetitum sit, meretur mortem æternam*; hujusmodi Propositionum partem illam, in qua continetur conditio, particula *si* notata, (ut in exemplo allato, *si mendacium sit lege divina vetitum*) appellant *antecedens*: pars altera, quæ ex priori sequi intelligitur, (ut in exemplo eodem, *mendacium meretur mortem æternam*) *consequens* dicitur.

Causalis appellatur, cujus partes connectuntur particula causali *quia, quoniam, &c.* ut, quia *Alexander est filius Philippi tenetur Philipum honorare.*

Relativam vocant, in qua notatur respectus inter rem unam et aliam, vel plures, ut in his, qualis *rex* talis *subditus* : Qualis *herus* tales *servi.*

Discretivam denique appellant, in qua Oppositio debita inter judicia diversa significatur particula *sed, tamen,* et istiusmodi, ut apud poetam, *Non Formosus erat, sed erat facundus Ulysses.*

Et si prædictæ Propositionum species compositæ, idque explicite, omnes habeantur; non tamen desunt rationes, quæ solas *Copulativas* et *Discretivas* ita dicendas suadeant; quod in aliis proprie dicta compositio reperienda non sit; nec in plures simplices, modo stricte loqui velimus, resolvi possint: sique paululum ipsis immorari velimus, facile id cernere erit.

Primo, in *Disjunctiva*, in qua Afferitur tantum disjunctio, adeo ut si vera sit pars una; vera etiam sit Propositio integra; cum nec de uno, nec de altero membro seorsim sumpto prædicatum affirmetur vel negetur, ut in exemplis prius positis.

Patet *secundo*, in *Conditionali*, ubi tantum afferitur connectio inter duas partes, *Antecedens* scilicet et *Consequens*, ut in trito isto exemplo, *si asinus habet alas, volat*, ubi nec afferitur Asino competere alas, nec eum volare: Afferitur tantum connectio inter partes hæc duas, *habere*

alas, et volare; et sensu eodem redit cum hac, *omne habens alas volat*.

Tertio, in Causali, ubi tantum asseritur ratio propter quam prædicatum de subiecto Affirmatur vel negatur; ut in exemplo prius allato, ubi asseritur ratio, propter quam tenetur *Alexander Philippum* honorare: quod nimirum sit ipsius filius, quæ ratio in Propositione hac generali fundatur: *omnis filius patrem suum honorare tenetur*: quod et clarius cerni poterit, immutato aliquantulum exemplo priore, hoc pacto, *Alexander tenetur Philippum honorare, quia Philippus est splendida veste amictus*, quæ Propositio falsam assignat rationem honoris debiti *Philippo*: quantumvis enim verum sit teneri *Alexandrum* patrem suum *Philippum* honorare; non tamen ideo debetur ab ipso honos hic, quod sit *Philippus* splendidâ veste amictus; unde et dicenda est integra ista Propositio falsa, nisi veram quis dicere velit hanc, *omni splendidâ veste amicto debetur Honos*.

Quarto, in Relativa, in qua asseritur tantum respectus inter rem unam et aliam, vel plures, ut in exemplis superius allatis, quæ huc redeunt, *subditus est similis regi*; *servi sunt similes Hero*.

Sunt et observanda quædam alia de membris Divisionis prædictæ, quæ alio referentes, hic loci consulto omittimus.

Propositionem *implicite compositam* subdividunt in *Exclusivam*, *Exceptivam*, *Comparativam*, *Inceptivam*, et *Desitivam*.

Exclusivam iterum aliam ponunt ratione prædicati, qualis est hæc, *Petrus scribit tantum*: in qua ita de *Petro* affirmatur *scribens*, ut simul
alia

alia omnia (actiones nimirum omnes, quales sunt Loquela et istiusmodi aliæ, de quibus intelligi supponitur Propositio ista) de eo negentur: aliam ratione *subiecti*, ut in hac, *solus Deus absolutum habet in homines imperium*, ubi non tantum Deo tribuitur *absolutum in homines imperium*, sed et simul de alio quovis illud negatur.

Exceptiva dicitur, in qua aliquid affirmatur vel negatur cum exceptione quadam notata particula *præter*, *præterquam*, et istiusmodi, ut, *Apostolorum nemo periit præter Judam proditorem*, quæ his duabus æquivalet, *Judas proditor periit, et nullus alius Apostolus periit*.

Ex exemplis hisce percipiet quivis levi mutatione transire Propositionem *Exclusivam* in *Exceptivam*; et vicissim hanc in illam: ut si pro modo allata *Exceptiva* ponatur *Exclusiva* hæc, *solus Judas ex Apostolis periit*; sique loco superius allatæ *Exclusivæ* ponatur *Exceptiva* hæc, *nemo in homines absolutum habet imperium præter Deum*.

Comparativam appellant, in qua, instituta inter plura comparatione, attributum de subiecto enunciatur in comparationis gradu aliquo supra (ut Loquuntur Grammatici) *positivum*, ut in hac, *Socrates fuit Græcorum sapientissimus*, ubi non tantum de Socrate asseritur quod sapiens fuerat; sed ipsi simul tribuitur, præ Græcorum quovis alio, *sapientiæ Gradus*.

Inceptivam et *Desitivam* tanquam affines describunt; illam dicentes, qua aliquid jam esse asseritur, quod prius non fuit, ut, *Inchoavi hodie*

die studium Logicæ : hanc, qua significatur aliquid jam non esse, quod prius fuit, ut in hac, *post Christi tempora, responsa dare desierunt Ethnicorum oracula* : Exempla hæc et hujusmodi alia facile in Propositiones plures resolvet, qui rite perpenderit.

Propositionem dividunt ulterius *quinto*, in *puram* et *modalem* ; illa dicitur, in qua de subiecto nude (id est, absque assignato modo convenientiæ vel discrepantiæ) affirmatur vel negatur prædicatum, ut in his, *Homo a Deo dependet, mundus non existit ab æterno* : hæc, in qua non tantum asseritur prædicatum subiecto convenire, vel ab eo discrepare ; sed et assignatur modus, quo subiecto illud convenit, vel ab eo discrepat ; ut in exemplis sequentibus, *hominem esse a Deo dependentem est necesse : Philosophum esse musicum est contingens : Petrum esse Philosophum est possibile : Mundum ab æterno existisse est impossibile*.

Ex exemplis hujusmodi colligere solent Logici Propositionum Modalium species quatuor, statuentes illarum quasdam de (ut Loquuntur) *necesse* : alias de *contingente* : alias de *impossibili* : alias de *possibili*. Propositiones Modales de *necesse*, et *impossibili*, habendas volunt pro *universalibus* : de *contingente*, et *possibili*, pro *particularibus*.

In hujusmodi propositionibus duo ponunt distinguenda, *dictum* et *modum* : Illud appellant quod locum tenet subiecti, sive in initio an fine propositionis reperiatur : hoc, quod locum tenet prædicati, ut in superius allato exemplo, *hominem esse a Deo dependentem* (propositionis utpote subiectum) nomen *dicti* obtinet : *necesse*
 2 (pro-

(propositionis prædicatum) nomen *modi*.

Sed his non vacat diutius immorari. *Progre-*
dimur ad

C A P. III.

De Variis Argumentandi Formulæ.

Sicut Judicia Noetica a mente formata aliis manifestamus Propositionibus, sive Enunciationibus; ita Ratiocinia mente concepta *argumentandi formulæ quibusdam*, signis utpote externis *Judicii dianoetici*, sive *Discursus*.

Argumentandi formulæ hæ communiter sex enumerantur, *Syllogismus*, *Enthymema*, *Inductio*, *Exemplum*, *Dilemma*, et *Sorites*; addunt nonnulli *Epichyrema*, quod dicere malunt alii *syllogismum Rhetoricum*.

Inter Argumentandi formulas has locum primum obtinet *syllogismus*, usus utpote longe communissimi: hic autem, prout postea cernere erit, dividi solet in *simplicem* et *Compositam*: hæc omnia cum absque articulorum distinctione distincte adeo tractari nequeant, ideo fit

Articulus primus de syllogismo, simplice præsertim.

Obtinuit diu in scholis decantata ista definitio syllogismi in genere, quod sit *oratio, in qua quibusdam positis, diversum quid a positis necessario sequitur, eo quod hæc sint*; cujus particulas varias viva voce explicandas remittimus: accuratius dicitur syllogismus, *Argumentandi formula, in qua ex duabus propositionibus expressis*
tertia

tertia per necessariam consequentiam infertur; ut in exemplo sequente.

minor subj. maj. term. or. pred.

Omne Extensum est divisibile;

Omne Corpus est Extensum:

Ergo omne Corpus est divisibile.

Syllogismo tribuunt *materiam* et *Formam*; illam subdividunt in *proximam* et *Remotam*: syllogismi materia *Proxima*, seu illud ex quo immediate conficitur, sunt tres propositiones, quarum duæ dicuntur *præmissæ*; tertia, quæ ex his infertur, *Conclusio*.

Materia *Remota*, ita dicta, quod inter hanc et syllogismum detur alia vicinior; sunt tres Termini, illi nimirum ex quibus fiunt prædictæ tres propositiones: horum duo dicuntur *Extrema*, quod per tertium connectantur (ut dici solet) aut separentur: Terminus tertius, ob hanc rationem, *Terminus medius*, vel simpliciter *medium*, appellatur.

Extrema hæc sunt partes propositionis illius, quæ ante probationem *Quæstio* dicitur, et præfixam habet interrogandi particulam, *an*, *num*, et istiusmodi; post probationem *Conclusio* appellatur, et propositam habet Conjunctionem (ut dici solet) conclusivam *Ergo*.

Terminus is, qui est propositionis hujus subjectum, dicitur *minus Extremum*, vel *Terminus minor*; quod plerumque fit minoris altero Extensionis, nunquam majoris.

Terminus alter, qui prædicati locum tenet, appellatur *majus Extremum*, vel *Terminus major*; quod fit plerumque majoris altero Extensionis, nunquam minoris.

Ex tribus hisce Terminis, varie dispositis, totidem fiunt propositiones, quarum una dicitur *Major*, alia *Minor*, tertia *Conclusio*.

Propositio major (quæ et dicitur interdum simpliciter *Propositio*) est illa, in qua confertur majus Extremum cum Termino medio, quemcunque locum, quod ad ordinem Propositionum, obtineat: *Propositio minor*, dicta etiam *assumptio*, est illa, in qua confertur minus Extremum cum Termino medio; *Conclusio* denique continet duo illa Extrema inter se collata.

Syllogismi Forma est debita materiæ ipsius dispositio: cumque, ut superius dictum, duplex sit syllogismi materia; hinc etiam ortum ducit Forma duplex, *figura*, et *modus*; ex quibus Judicandum an apta fuerit Terminorum in præmissis, et ipsarum præmissarum dispositio, ad Conclusionem rite inferendam.

Figura materiam syllogismi remotam respicit, estque apta Dispositio Termini medii cum extremis in præmissis.

Modus est debita dispositio trium propositionum, ex quibus constat syllogismus, secundum Quantitatem et Qualitatem: per Propositionis Quantitatem intelligitur ipsius universalitas, vel particularitas: per Qualitatem, affirmatio vel negatio.

Ex dictis colligitur facile quaternarius Figurarum numerus, quod quatuor tantummodo diversis modis possit Terminus medius cum Extremis disponi in præmissis: vel enim primo, Terminus medius majori extremo subjicitur, et de minore prædicatur (vel quod eodem redit, est subjectum propositionis majoris, prædicatum minoris;) unde oritur *Figura prima*; vel secundo, de utroque Extremo prædicatur (sive est prædicatum

dicatum utriusque præmissæ;) atque hinc fit *Figura secunda*; vel *tertio*, utrique Extremo subjicitur (sive est subjectum utriusque præmissæ;) atque hinc oritur *Figura tertia*, secundum vulgatum istud *sub. præ. prima*; bis *præ. secunda*; *tertia bis sub*; vel denique *quarto* de majore extremo prædicatur, et minori subjicitur; sive est prædicatum propositionis majoris, et subjectum minoris; atque hinc oritur *Figura quarta Galeni* dicta: quartam autem hanc figuram, quod non adeo frequens sit, atque in ea modus concludendi non adeo habeatur naturalis, hic loci nominasse sufficiat.

Modi syllogistici alii dicuntur *Indirecti*, in quibus scilicet non infertur Conclusio proxime sequens ex præmissis, sed alia ex hac ducta: ut si ex duabus præmissis sequentibus,

Omne Extensum est divisibile:

Omnis lapis est Extensus:

Inferatur hæc Conclusio,

Ergo aliquod divisibile est Lapis.

Hæc autem sequitur tantum ex Conclusionem sequente, quæ ex iis præmissis naturaliter et directe sequitur.

Ergo Omnis Lapis est Divisibilis.

Sed indirecti isti modi exigui adeo sunt momenti, ut notatu digni vix habeantur.

Modi *Directi*, sive directe concludentes, quatuor assignantur Figuræ primæ; totidem secundæ; et sex tertiæ; qui omnes vocibus quibusdam fictis, quatuor sequentibus versiculis contentis, signari solent.

A = omnis - affirmat universaliter
E = nulla - negat universaliter
I = aliquod - affirmat particulariter
O = aliquod non - negat particulariter

B. 1. *Forma* bArbArA, cElArEnt, dArII, fErIO, data 2

C 2 *3^{ty}* primæ: 4

D. 3 cElArE, cAmEstrEs, fEstInO, bArOcO,

F. 4 secundæ: 4

Tertia dArAptI, sibi vëndicat atque fEl-
lAptOn:

Adjungens dIsAmIs, dAtIsI, bOcArdO,
fErIsOn. 6 = 14

In vocabulis hisce technicis, tres syllabæ in singulis reperiendæ notant tres propositiones syllogismi, cui tanquam signa præponuntur; syllaba prima, propositionem majorem: secunda, minorem: tertia, Conclusionem.

Syllabarum rursus vocales sunt *a, e, i, o*, quarum tres in singulis hisce vocibus fictis reperiuntur, et signant propositionum, quibus sunt præfixæ, *Quantitatem* (cujus nomine, ut prius notatum, intelligitur universalitas, vel particularitas) et *Qualitatem*, sive, ut superius dictum, affirmationem aut negationem.

Propositiones singulares, quod ipsarum subjecta sumantur in tota Extentione (si extensionis nomen mereatur) sive latitudine quæ ipsis competit, pro universalibus, quantum ad regulas syllogisticas spectat, habentur; vel quod eodem redit, regulæ syllogisticæ eædem, ob modo datam rationem, et his et illis inserviunt.

Quod ad propositiones *Indefinitas*, sunt hæ, quod ad sensum, vel universales, ubi nimirum ipsarum subjecta, Termini universales, in tota sua Extensione sumuntur, atque ideo propositionum universalium regulas observant; vel Particulares, ubi nimirum universales illi Termini, ipsarum subjecta, summuntur in parte tantum

suæ Extensionis; ac proinde propositionum particularium regulæ hoc in Casu iis inserviunt.

His positis, Doctrinæ ordo exigere videtur, ut regulas de syllogismis rite conficiendis tradamus, harum demonstrationes, quod a Tyronibus facile capi nequeant, alio remittentes.

Regulæ hæ vel sunt Generales, ita dictæ quod Figuris omnibus sint communes; vel Speciales, singulis sc. Figuris propriæ.

Regulas generales tradunt alii plures, alii pauciores; maxime notandi sunt sequentes.

Regula prima.

In Syllogismo poni debent tres Termini, nec plures, nec pauciores.

Regula secunda.

Medius Terminus debet semel saltem sumi universaliter, sive in tota ipsius Extensione, vel (quod eodem redit) Terminus medius bis particulariter sumi nequit.

Regula tertia.

Termini Conclusionis universalius, sive in majore Extensione sumi non debent in ipsa conclusione, quam in præmissis sumebantur.

Regula quarta.

Debet altera saltem præmissarum esse affirmativa: vel prout aliis verbis tradi solet, ex utraque præmissa negativa nihil concluditur.

Regula quinta.

Si utraque præmissa fuerit affirmativa, debet etiam Conclusio esse affirmativa.

Regula sexta.

Conclusio debet sequi partem debiliorem, debiliior autem pars intelligitur, propositio Negativa, si inter hanc et Affirmativam instituatur comparatio; particularis item, si cum universalis comparatur; sensus igitur regulæ huc redit; Si altera præmissarum fuerit Negativa, debet etiam Conclusio esse Negativa; si altera fuerit Particularis, debet etiam Conclusio esse Particularis.

Regula septima.

Ex utraque præmissa particulari nihil sequitur.

Præter regulas hasce generales, singulis figuris assignantur regulæ Speciales ipsis propriæ.

Figuræ Primæ

Duæ sequentes.

Reg. prima. Propositio minor debet esse affirmativa.

Reg. secunda. Propositio major debet esse universalis.

Regulæ speciales figuræ secundæ sunt duæ sequentes.

Reg. prima. Altera præmissarum debet esse negativa.

Reg. secunda. Major debet esse universalis.

Figure etiam tertiæ sunt regulæ speciales duæ.

Reg. prima. Minor debet esse affirmans.

Reg. secunda. Conclusio debet esse particularis.

Traditâ Doctrinâ de syllogismis rite fabricandis, Tyronum gratia, addere convenit syllogismorum in variis Modis harum trium Figurarum Exempla, quod ut ordine fiat, sequuntur

Exempla modorum

Figure primæ

Subject

predicate

univers bAr Omnis Creatura ratione prædita est legi divinæ subjecta. *middle term predicate*

affirm bA Omnis Homo est Creatura ratione prædita:

rA Er. Omnis Homo est Legi divinæ subiectus.

cE Nulla substantia Extensa est Cogitationis Capax.

lA Omne Corpus est substantia Extensa:

rEnt Er. Nullum Corpus est Cogitationis capax.

dA Omne noxium est fugiendum:

rI Aliquod ludi genus est noxium:

I Er. Aliquod ludi genus est fugiendum.

fE Nullus avarus est beatus:

rI Aliquis opibus abundans est avarus:

O Er. Aliquis opibus abundans non est beatus.

Ex-

Exempla Modorum

Figuræ Secundæ.

cE Nullus aperte flagitiosus est Deo acceptus :

sA Omnis sincere pius est Deo acceptus :

rE Er. Nullus sincere pius est aperte flagitiosus.

cA Omnis Homo est substantia composita ex corpore et mente unitis :

mEs Nullus Angelus est substantia composita ex corpore et mente unitis :

trEs Er. Nullus Angelus est Homo.

fEs Nihil sanitati noxium est appetendum :

rI Aliquod medicamenti genus est appetendum :

nO Er. Aliquod medicamenti genus non est sanitati noxium.

bA Omnis vera Propositio est Divinæ Revelationi consona :

rO Quædam apud Ethnicos tanquam axiomata recepta non sunt Divinæ Revelationi consona :

cO Er. Quædam apud Ethnicos tanquam axiomata recepta non sunt veræ Propositiones.

*Exempla Modorum**Figura Tertia.*

dA Omnis Angelus est subjectus Legi Divinæ :
 rAp Omnis Angelus est naturæ elevatæ supra
 humani generis sortem :

tI Er. Aliquid naturæ elevatæ supra humani
 generis sortem est subjectum Legi Di-
 vinæ.

fE Nulla regiminis humani species caret suo
 incommodo :

10 lAp Omnis regiminis humani species est bono
 publico destinata :

tOn Er. Aliquid destinatum bono publico non
 caret suo incommodo.

dI Quædam actiones in literis sacris damnatæ
 ab Ethnicis laudabantur :

// sA Omnes actiones in literis sacris damnatæ
 ad æternam ducunt miseriam ;

mIs Er. Quædam ad æternam ducentia mise-
 riam ab Ethnicis laudabantur.

dA Omnis vere Religiosus est cælestis Diade-
 maris Hæres :

12 tI Quidam vere Religiosus est in hac vita E-
 genus :

sI Ergo quidam in hac vita Egenus est cæle-
 stis Diadematis Hæres.

13 bO Quædam ludorum genera non sunt licita:
 cAr Omne ludi genus recreatio dicitur:
 dO Er. Quædam recreationes dicta non sunt
 licita.

fE Nihil animæ immortalis noxium est appen-
 tendum:

14 rI Quædam animæ immortalis noxia sunt sen-
 sibus grata:

sOn Er. Quædam sensibus grata non sunt ap-
 petenda.

Si inter Figuras has tres instituatur compa-
 ratio, merito aliis præfertur *prima*, quod in
 hac non tantum maxime naturalis videatur Ter-
 minorum dispositio, et conclusionis illatio ex
 præmissis facillime innotescat; sed et quod in
 eâ omnia conclusionum genera reperiantur, siue
 fuerint hæ *universales* an *particulares*, *affirman-*
tes an *negantes*: in Figura autem *secunda* nulla
 reperitur conclusio *affirmans*; in *tertia* nulla *uni-*
versalis. *nullus* or *non* *aliquis* or *quædam*

Nequis autem decipiatur ex regularum speci-
 alium, quæ superius traditæ sunt, observatione,
 in fabricandis syllogismis *primæ* hujus Figure,
 aut etiam *secundæ*, *Cautionem* unam aut alteram
 in regulas speciales hic loci addere lubet.

CAUTIO Prima

*In regulam specialem primam**Figuræ Primæ.*

Stabilitam supponimus Figuræ hujus regulam specialem primam: *Minor debet esse affirmativa*: Operæ pretium tamen duximus, hic loci Notasse quasdam esse Propositiones, quæ si solitarie et absque respectu ad alias spectentur, non tantum videntur, (ut Logici fere omnes loqui amant) sed et re vera sunt negativæ; si consideretur respectus quem habere supponuntur ad Propositiones quasdam alias, pro affirmativis merito sunt habendæ; ut in Propositione minore syllogismi sequentis.

^{(18) in}
Quod non est Corporeum non est sensibus obviū: ⁱⁿ

Mens humana non est Corporea:

Er. Mens humana non est sensibus obvia.

Cujus syllogismi Propositio minor non tantum apparet, sed revera est negativa, si solitarie spectetur; si consideretur respectus quem habet ad syllogismi hujus majorem, merito habetur pro affirmativa; Propositionis quippe majoris subjectum, qui est Terminus medius (qui proinde, secundum prius tradita de Dispositione Termini medii in prima hac Figura, necessario debet minoris prædicatum fieri) subjectum hoc, inquam, non est Corporeum, sed non Corporeum, sive quicquid non est Corporeum; hoc autem

autem *non Corporeum* convenire asseritur sub-
jecto Propositionis minoris, non ab ea discre-
pare; unde nec, considerato prædicto respectu,
haberi debet negativa, sed affirmativa; atque
hinc est quod *minoris* istius sensus hic dicatur;

Mens humana est ex illarum rerum numero,
quæ non sunt Corporeæ, vel quæ sunt res non
Corporeæ.

Quodque Propositio hæc sit affirmativa con-
stans prædicato negativo, quale est etiam ma-
joris subjectum, vix in dubium vocabitur: ul-
terioris utcunque illustrationis gratia prædi-
ctum syllogismum reducere lubet ad formam
sequentem, licet non usitatam.

De quocunque vere negari potest attributum
hoc Corporeum, illud non est sensibus ob-
vium:

Sed de mente humana vere negari potest at-
tributum hoc Corporeum:

Er. Mens humana non est sensibus obvia.

CAUTIO Secunda

In regulam specialem Eandem.

Est et Cautio alia non minus notanda, ne
quis in prædictæ regulæ specialis applicatione
erret, quod sc. fieri possit, ut syllogismus in pri-
ma Figura rite concludat, licet minor solitarie
considerata sit negativa, modo Propositio major
sit exclusiva, ut in sequente exemplo.

Soli credentes in Christum servabuntur:

Sed aliqui profitentes Religionem Christia-
nam non credunt in Christum:

Er. Aliqui profitentes Religionem Christia-
nam non servabuntur.

Ubi particula *soli* Efficit, ut Propositio major, quæ ideo est implicite composita, his duabus æquipolleat.

Credentes in Christum servabuntur :

Et

Non credentes in Christum (sive cæteri qui non credunt) non servabuntur.

Atque ex hac posteriore pendet argumenti vis, ut huc redeat integer syllogismus prædictus.

Qui non credunt in Christum non servabuntur :

Sed Aliqui profitentes Religionem Christianam non credunt in Christum :

Er. Aliqui profitentes Religionem Christianam non servabuntur.

Ubi, ut in *Cautione priore*, *majoris* subiectum non est Credentes in Christum, seu qui credunt in Christum, sed Non Credentes, seu qui non credunt in Christum ; cumque ex requisita Dispositione Termini medii cum extremis in *prima* hac Figura, debeat idem fieri minoris prædicatum, hoc in ea asseritur convenire cum minoris subiecto, non ab eo discrepare ; ob quam rationem patet Propositionem minorem, etsi solitarie considerata re vera sit negativa, habendam pro affirmativa, si consideretur respectus, quem habet ad Propositionem majorem ; quod et adhuc clarius fiet, si, ut in superiore Exemplo, ad hanc reducatur formam.

Aliqui profitentes Religionem Christianam sunt ex illorum numero qui non credunt in Christum.

C A U T I O

CAUTIO Tertia

In regulam specialem primam

Figuræ secundæ.

Est et periculum ne quis fallatur in applicanda regula hac speciali, *debet altera præmissarum esse negativa*: nisi advertat videri propositiones quasdam esse affirmativas, quæ tamen, ob Exclusivas, quæ in ipsis reperiuntur, voces, includunt Propositiones negantes, quarum, quod ad argumenti vim, præcipua, si non sola ratio habetur; ut cernere erit in syllogismo sequente, qui forte videri poterit ex omnibus affirmantibus in *Figura secunda* constare, adeoque in datam *Figuræ hujus regulam specialem* peccare.

Omnis vere pius sincere studet Dei gloriam promovere:

Pauci hoc seculo sincere student Dei gloriam promovere:

Er. Pauci hoc seculo sunt vere Pii.

Cujus syllogismi Propositio minor, cum, ob vocem hanc *Pauci*, sit Exclusiva, ac proinde implicite composita, his duabus Equivalet:

Aliqui hoc seculo sincere student Dei Gloriam promovere:

Et

Multi hoc seculo non sincere student Dei Gloriam promovere.

Cumque ex hac posteriore pendeat Argumenti vis, infertur conclusio etiam sensu negativa ad hanc formam reducenda.

E 2

Er.

Er. Multi hoc seculo non sunt vere Pii.

Ut si Notetur Argumenti vis, huc redeat integer syllogismus.

Omnis vere pius sincere studet Dei Gloriam promovere :

Multi hoc seculo non sincere student Dei Gloriam promovere :

Ergo, Multi hoc seculo non sunt vere Pii.

Syllogismi varias afferunt Logici Divisiones, quarum quæ ab ipsius materia desumuntur (cujusmodi est illa, in *Demonstrativum*, et *Dialecticum*, seu *Probabilem*,) Animus non est hic loci attingere, dum Argumentandi formulis describendis et illustrandis incumbimus.

Inter Divisiones, quæ a syllogismi formâ ducuntur, primum locum obtinet illa, in *simplicem*, dictum etiam *Categoricum*, et *Compositum*.

Syllogismum *simplicem* dicunt communiter illum, in quo Terminus medius cum uno tantum extremorum in Propositione una comparatur ; accuratius fortè ob rationes alibi dandas syllogismus simplex est, in quo in Propositione eadem non reperiuntur Termini plures duobus ; ut in exemplis superius allatis, atque de hoc syllogismorum genere hæcenus Egimus.

Syllogismum *Compositum* dicere solent illum, in quo Terminus medius cum utroque extremo in Propositione una comparatur ; accuratius, in quo in Propositione eadem reperiuntur omnes tres Termini, Major scilicet, Minor, et Terminus medius.

Syllogismum *Simplicem*, seu *Categoricum*, subdividere solent in *Incomplexum*, cujus Propositiones omnes sunt Incomplexæ, ut in hoc,

Omnis

Omnis Spiritus est substantia:

Omnis Angelus est Spiritus:

Er. Omnis Angelus est substantia.

Et *Complexum*, Cujus una vel plures propositiones sunt *Complexæ*, quales sunt quas tanquam *Exempla* modorum attulimus in tribus figuris, atque hoc ideo factum, ut syllogismis *Complexis* fabricandis semet assuefaciant Tyrones, quod inter Argumentandum raro admodum occurrunt syllogismi *incomplexi*, quales in modorum exemplis communiter poni solent.

Membrorum hujus divisionis Explicationem aliam a Recentioribus quibusdam traditam alibi proponendam remittimus.

Syllogismum *Compositum*, dictum etiam *Conjunctivum*, subdividunt communiter in tres species, *Conditionalem* scilicet, *Disjunctivum*, et *Copulativum*.

De quorum singulis pauca dicemus Articulis distinctis.

ARTICULUS Secundus

De syllogismo Conditionali.

Syllogismus *Conditionalis*, sive *Hypotheticus* dicitur, cujus propositio major est *Conditionalis*, includens (ut dictum Capite præcedente) partes duas, quarum prior appellatur *Antecedens*, et posterior *Consequens*; ut in sequente Exemplo.

Si Homo Cogitat, est in Homine Cogitandi principium:

Sed Homo Cogitat:

Er. Est in Homine Cogitandi principium:

Vel prout brevitatis gratia exprimi solent Minor et Conclusio.

Sed verum est prius:

Ergo et posterius.

Et in hoc alio.

Si mundus ab æterno existeret est infinite perfectus:

Sed Mundus non est infinite perfectus:

Ergo Mundus non existeret ab æterno.

Vel brevitatis gratia.

Sed falsum posterius:

Ergo et prius.

In *Conditionalibus* his syllogismis, vel proceditur a *positione*, ut dici solet, sive *affirmatione antecedentis*, ad positionem sive affirmationem *Consequentis*, ut in Exemplo priore; vel a remotione sive negatione *Consequentis* ad Remotionem sive negationem *Antecedentis*, ut in posteriore, secundum vulgatum istud.

Posito Antecedente ponitur Consequens.

Sublato Consequente tollitur Antecedens.

Habentur modi hi procedendi, pro regulis syllogismorum Conditionalium, ita ut vitiosus sit censendus syllogismus quivis Hypotheticus, procedens a positione Consequentis ad positionem Antecedentis, vel a remotione Antecedentis ad remotionem Consequentis. Hic autem, ut prius, in regulas speciales syllogismorum simplicium convenit observationem unam aut alteram addere in modos procedendi, qui, ut dictum, inserviunt vice regularum Syllogismorum Conditionalium.

Observandum itaque *primo* merito interdum censeretur, poni, sive affirmari Antecedens, dum pro-

propositio minor, in qua reperitur, est negativa, si solitarie spectetur, absque scilicet respectu ad majorem Conditionalem, quæ præcessisse supponitur, ut,

Si Adamus non præstitit debitam obedientiam Legi Divinæ, fuit obnoxius pœnæ a Deo Denunciatæ:

Sed Adamus non præstitit debitam obedientiam Legi Divinæ:

Er. Adamus fuit obnoxius pœnæ a Deo Denunciatæ.

Ubi licet Minor, in qua reperitur antecedens propositionis majoris, sit negativa, si solitaire consideretur, merito tamen in propositione hac minore censetur poni, sive affirmari antecedens; non enim est illud, *Adamus præstitit, &c.* sed *Adamus non præstitit debitam Obedientiam Legi Divinæ*; atque illud idem est quod in propositione minore asseritur.

Observandum secundo, *Removeri* interdum sive negari Consequens, dum Minor, in qua reperitur, seorsim et solitarie considerata, est affirmativa, ut in Exemplo sequente.

Si mens humana est res Corporea non est substantia Cogitativa:

Sed mens humana est substantia Cogitativa:

Er. Mens Humana non est res Corporea.

Ubi Minor, licet, si solitaire consideretur, absque respectu ad præcedentem propositionem majorem, sit re vera affirmativa, merito tamen Censetur *Remotio*, sive *Negatio* illius, quod est Consequens Majoris Conditionalis, cum ipsi Contradicat; Consequens enim illud non est

Mens

Mens Humana, &c. sed Mens Humana non est substantia cogitativa, cui contradicit syllogismi modo allati Minor affirmans.

Observandum tertio Consequenter ad prius dicta in Observatione secunda in Regulam primam specialem Figuræ primæ, syllogismorum simplicium efficere particulam *Exclusivam*, eamque interdum subintellectam, ut videatur syllogismus Conditionalis in datas regulas pec- care, qui tamen Legitime procedit, ut in Exem- plo sequente.

Si Joannes Baptista fuit reus criminis morte puniendi, tum tantum potuit Jure Capite plecti :

Sed Joannes Baptista non fuit reus criminis morte puniendi.

Er. Joannes Baptista non potuit Jure Capite plecti.

Ubi particula *tantum* (quæ etiam, ut atten- denti patebit, supprimi poterit) efficit ut pro- positio major his duabus æquipolleat.

Si Joannes Baptista fuit reus Criminis morte puniendi, potuit Jure Capite plecti :

Et,

Si Joannes Baptista non fuit reus Criminis morte puniendi, non potuit Jure Capite plecti.

Cumque ex propositione hac posteriore pen- deat argumenti vis, hæc sola considerata ve- nit tanquam ad dictum syllogismum spectans, in Minore autem ponitur hujus Antecedens, sive asseritur ipsius veritas, Minor quippe hæc fuit.

Joannes Baptista non fuit reus Criminis morte puniendi.

Unde

Unde et in Conclusionē ponitur prædictæ propositionis Conditionalis Consequens, siue assertur Consequentis veritas.

Er. Joannes Baptista non potuit Jure Capite plecti.

Argumentandi formulæ huic ulterius Illustrandæ conducere posse autumamus, notasse syllogismorum Conditionalium usum, primo quod ad eos, qui procedunt a positione Antecedentis ad positionem Consequentis, huic plane usui inserviunt, ut de sententia sua deducatur adversarius, contra quem quis arguit, dum negat is propositionem veram ab opponente prolatam, utitur nimirum hoc in Casu Opponens syllogismo constante majore Conditionali, cujus Antecedens est ita aperte verum, ut supponi possit non etiam illud negaturum adversarium, idque in hunc finem, ut antecedente hoc concessio teneatur etiam Adversarius veram agnoscere propositionem prius a se negatam, quod ex prius concessio antecedente sequatur, cum sit Majoris istius Consequens.

Exemplo rem hanc illustrare lubet, si quis negaverit propositionem hanc, *Mundus regitur providentia*, supponi non etiam eum negaturum, *Esse Deum*: Mundi autem regimen per providentiam arctam adeo habet cum Existentiâ divinâ Connectionem, ut hoc concessio non possit illud negare, unde ita formatur Argumentatio.

Si Deus est, Mundus regitur providentia:

Sed Deus est:

Er. Mundus regitur providentia.

Quod ad Syllogismos Conditionales, secundo modo procedentes, a Remotione, sc. siue negatione Consequentis, ad remotionem siue negationem

tionem antecedentis; inserviunt hi detegendæ falsitati propositionis ab adversario prolatae tanquam veræ; vel ad modum Theseos, quæ impugnanda venit, propositæ: hoc in Casu utitur Opponens syllogismo Conditionali, cujus propositionis majoris antecedens est falsa ista propositio ab adversario tanquam vera prolata, Consequens ita aperte falsum et absurdum, ut supponi possit non etiam illius veritatem asserturum Adversarium; idque in hunc finem, ut si agnoscat Consequentis hujus falsitatem, agnoscere etiam teneatur falsam esse propositionem, quam prius tanquam veram protulerat; quod sit hæc majoris illius antecedens, sitque apud omnes receptum vulgatum istud axioma, *Ex veris nil nisi verum.*

Hanc etiam observationem exemplo illustrabimus, Si quis tanquam veram protulerit propositionem hanc, *Justitia est ex operibus Legis*: supponi poterit eum (modo ex illorum numero fuerit qui Christianam profitentur fidem) non etiam asserturum, *Christum frustra mortuum esse*: hoc autem ita aperte sequitur ex propositione ista alia, ut si hujus falsitatem agnoscat, agnoscere etiam teneatur falsam esse propositionem, quam prius tanquam veram, atque ideo a se sustinendam protulerat; hinc ita formatur argumentatio.

Si Justitia sit ex operibus Legis, Christus frustra mortuus est:

Sed Christus non frustra mortuus est:

Er. Justitia non est ex operibus Legis.

Vel brevitas gratia.

Sed falsum posterius:

Er. et prius.

Ex dictis facile percipiet quivis in syllogismis hisce Hypotheticis, notandam præcipue propositionis Conditionalis sequelam, five Consequentiam: an scilicet sit æctus adeo nexus inter partes ipsius duas, ut ex Antecedente necessario sequitur Consequens: five an supposita veritate Antecedentis, recte inferri possit esse item Consequens verum.

Tradi solent nonnulla de syllogismis aliis Conditionalibus, quorum propositiones omnes sunt Conditionales: ut in Exemplis sequentibus.

Si Petrus est e numero subditorum Britannicorum tenetur Justis serenissimi Regis Georgii mandatis obtemperare:

Sed si Petrus in Britanniae Regno fixam habet Domicilii sedem, est e numero subditorum Britannicorum:

Er. Si Petrus habet in Britanniae Regno fixam Domicilii sedem, tenetur Justis Serenissimi Regis Georgii mandatis obtemperare.

Sed cum ad syllogismum Conditionalem sufficiat major sola Conditionalis, hisce aliis non immoramur. *Sequitur*

ARTICULUS Tertius

De syllogismo Disjunctivo.

Syllogismus Disjunctivus dicitur, Cujus propositio major est Disjunctiva; ut in Exemplo sequente.

Spiritus vel est res Cogitativa vel Extensa:

Sed non est res Extensa:

Er. Est res Cogitativa.

Ubi, ut patet, proceditur a remotione partis unius ad positionem alterius.

In maiore autem Disjunctiva reperiuntur interdum membra plura duobus, quo in casu processus fieri poterit, vel *primo*, a remotione partium omnium, excepta una, ad positionem unius istius partis, ut in exemplo sequente.

Vel est Ver, vel Æstas, vel autumnus, vel Hyems:

Sed nec est Ver, nec Æstas, nec Autumnus:

Ergo est Hyems.

Vel *secundo*, a negatione partis unius, ad Disjunctivam positionem reliquarum: ita supposita priore Maiore Disjunctiva subsumi poterit.

Sed non est Ver:

Er. Est vel Æstas, vel Autumnus, vel Hyems.

Vel *tertio*, a negatione partium plurium una, ita ut etiam partes plures una sint residuæ ad disjunctivam positionem reliquarum, ut si subsumatur.

Sed nec est Ver, nec Æstas:

Atque inde inferatur conclusio.

Er. Vel est Autumnus, vel Hyems.

Contendunt nonnulli rite procedere syllogismum disjunctivum, a positione unius partis ad negationem alterius, vel reliquarum: a disjunctiva etiam positione partium plurium unâ ad negationem reliquarum, si plures una fuerint: ut si supposita prædicta Maiore disjunctiva, ita procedatur.

Sed est Hyems:

Er. Nec est Ver, nec Æstas nec Autumnus.

Vel,

Sed est vel Autumnus, vel Hyems:

Er. Nec est Ver, nec Æstas.

Licet

Licet a Logicis plerisque legitimus pronuncietur modus hic procedendi, a positione partis unius ad negationem alterius, ubi sunt partes tantum duæ, vel reliquarum, si plures fuerint; a disjunctiva etiam positione partium quarundam ad negationem aliarum; concedunt tamen ipsi naturalem adeo non esse hunc modum procedendi.

Sin penitus hanc rem quis examinaverit, percipiet merito rejiciendum, quod ad formam spectat, quantumvis interdum ratione materiæ conclusio vera ex præmissis, ita dispositis, sequatur; in Majore quippe disjunctiva non negatur utramque partem (judicandum similiter de omnibus, si pluries fuerit duabus) posse simul esse veram: negatur tantum fieri posse, ut utraque (vel omnes, si plures fuerint) sit simul falsa: ita rite procedit sequens syllogismus.

Is qui acquisivit accuratam in Linguis et artibus liberalibus peritiam, vel est ingenii felix, vel seriam valde adhibuit studiis operam.

(Sed non est felix ingenii:)

Er. seriam valde adhibuit studiis operam.

Nequaquam autem rite procederet syllogismus hic, si minor foret,

Sed est felix ingenii:

Et inde concluderetur,

Er. seriam valde operam studiis non adhibuit.

Nec,

Sed seriam valde operam studiis adhibuit:

Ergo non est ingenii felix.

Nihil enim impedit, quo minus sit idem ingenii felix, et seriam simul navet studiis operam.

Qui

Qui aliter censent, communiter super his recepta in omnibus sectantes, exigunt tanquam conditiones ad syllogismum Legitimum disjunctivum requisitas, *primo*, Ut membra sint immediate inter se opposita, ita sc. ut se mutuo ponant, ac tollant, ut nimirum rejecto altero, necessario alterum stabiliatur, et vicissim stabilito altero, alterum rejiciatur. *Secundo*, Ut, si plura fuerint duobus, plena fiat membrorum omnium enumeratio; sed cuivis attendenti planum fiet, conditiones has ad Argumentandi materiam, non ad formam, de qua impræsentiarum agitur, spectare. Progredimur ad

ARTICULUM Quartum

De syllogismo Copulativo.

Syllogismus *Copulativus* est, cujus Propositio major est copulativa negans, ut in exemplo.

Nemo simul servit Deo et Luxui:

Sed Vir Pius servit Deo:

Er. Vir Pius non servit Luxui.

Hujusmodi syllogismi tum demum rite concludunt, ubi altera pars propositionis Majoris negativæ in Minore stabilitur, sive affirmatur, ut altera pars in Conclusionem rejiciatur, sive negetur: non e contra, ubi pars altera in Minore tollitur, sive negatur, ut altera in Conclusionem stabiliatur, sive affirmetur: prout cernere poterit quivis, si supposita modo allata Majore, hunc in modum procedere aggrediatur.

Sed Avarus non servit Luxui:

Er. Avarus servit Deo.

Dictum

Dictum in syllogismi copulativi descriptione, ejus major propositio est copulativa negans, omnino quippe ridiculum foret, si quis ex Majore copulativa affirmante, et Propositione alia Minoris loco, Conclusionem ducere velit hunc in modum.

Paulus fuit Doctus et Pius:

Sed Paulus fuit Doctus:

Er. Paulus fuit Pius.

Vel,

Ergo Paulus non fuit Pius.

Diximus superius præter syllogismum, alias enumerari Argumentandi formulas, *Enthymema* scilicet, *Inductionem*, *Exemplum*, *Dilemma*, et *Soritem*, quibus addunt nonnulli *Epichyrema*: Formulæ autem hæ, ut rite perpendenti patebit, ad syllogismum (nonnulli ad unum, alii ad plures) reduci possunt omnes: De harum singulis pauca dicemus. Quare sit

ARTICULUS Quintus

De Enthymemate.

Non aliud est *Enthymema*, quam *syllogismus*, cujus altera præmissarum reticetur: cumque in Argumentandi formula hac duæ tantum Propositiones expressæ reperiantur; illarum prior dicitur *Antecedens*, illa nimirum, ex qua, et propositione subintellecta, alia infertur; posterior, quæ *consequens* appellatur, illa est, quæ ex antecedente et subintellecta propositione infertur, ut in hoc exemplo.

Omne Corpus est extensum:

Ergo, Omne Corpus est Divisibile.

Utque

Utque intelligatur utra præmissarum syllogismi in Enthymemate supprimatur, afferri solet regula hæc, *si in antecedente reperiatur conclusionis* (quæ in Enthymemate *Consequens* dicitur) *subjectum, supprimitur propositio major*, ut in exemplo modo allato, ubi subintelligitur hæc:

Omne extensum est Divisibile.

Sin in antecedente Conclusionis, sive Consequentis, expressum reperiatur prædicatum, supprimitur propositio minor, ut in hoc.

Quicquid est a Deo revelatum est verum !

Er. Mundum fuisse conditum spatio sex dierum est verum :

Ubi minor hæc supprimitur.

Sed mundum fuisse conditum spatio sex dierum est a Deo revelatum.

Agnosendum tamen occurrere interdum Enthymemata in quibus nec reperitur in *Antecedente*, Conclusionis, sive Consequentis subjectum, nec prædicatum, quale est hoc.

Deus est Verax :

Er. Nullus electorum peribit.

Hujusmodi Enthymemata reducunt communiter ad syllogismos Hypotheticos, sive Conditionales, supplendo Majorem conditionalem, eodem cum Enthymemate, antecedente et consequente constantem ; ita Enthymema prædictum ad hunc Hypotheticum reducunt.

Si Deus est Verax, nullus electorum peribit :

Sed Deus est Verax :

Er. Nullus electorum peribit.

ARTICULUS Sextus

De Inductione, et Exemplo.

Inductio dicitur Argumentandi formula, in qua ex plena enumeratione partium totius alicujus, vel inferiorum Termini universalis, insertur Conclusio de ipso toto, vel universali Termino, ut in hoc exemplo, de toto et partibus.

- Libri et veteris et novi Testamenti sunt Divinæ Autoritatis:

Er. Tota scriptura sacra est Divinæ Autoritatis.

- Et in hoc alio, de Termino universali et ipsius inferioribus.

o Omnis Homo simul et omne brutum est substantia:

- Ergo omne animal est substantia.

Exemplum dicitur Argumentandi formula, in qua ex una vel pluribus singularibus instantiis propter rationem similem insertur conclusio de simili alio, ut in vulgato hoc exemplo.

Cæsar inimico Ciceroni pepercit; quidni ergo Catoni?

Argumentandi formula hac frequenter utuntur oratores; raro Philosophi, nec re vera rite concludit exemplum quidvis, nisi ratio, quæ in una vel pluribus instantiis reperitur, eadem omnino fuerit in altera, vel omnibus, ut in hoc.

Abrahamus justificatus est fide:

Ergo omnes electi fide justificabuntur.

Quod rite concludet non adeo ratione formæ, quam quod in salvandis electis eadem sit justificationis ratio.

Diximus superius Argumentandi formulas has ad syllogismum unum, vel plures reduci posse, atque hactenus ostendimus, non aliud esse Enthymema, quam syllogismum, cujus altera præmissarum reticetur.

Quod ad duas has Argumentandi formulas *Inductionem* et *Exemplum*; eas ob rationem statim assignandam eodem complectimur articulo; si enim strictius loqui velimus, non adeo Argumentandi formulæ ab Enthymemate diversæ, quam distinctæ Enthymematum species a materia desumptæ reperientur.

Est enim Inductio syllogismus, cujus altera præmissa supprimitur, Conclusionem inferens de toto, vel Termino universali, ex enumeratione partium totius, vel inferiorum Termini universalis: Ita facile suppleri poterit propositio suppressa, in superius allata Inductione de scriptura sacra, modo ad syllogismum Hypotheticum reducatur hoc pacto.

Si Libri novi et veteris Testamenti sunt Divinæ Autoritatis, tota sacra scriptura est Divinæ Autoritatis: (sed brevitatis gratia) sed verum prius: Er. et posterius.

Similiter de instantia Inductionis, altera de Termino universali, et ipsius inferioribus judicandum.

Non minus pater exemplum, aliud non esse quam Enthymema, vel syllogismum, in quo suppressa altera præmissarum, ex una vel pluribus instantiis inferitur Conclusio de casu simili; ita suppleri poterit suppressa propositio prædicti exempli de Cæsare, posita Majore conditionali.

Si *Cæsar* inimico suo pepercit Ciceroni, parceret etiam Catoni:

Sed *Cæsar* inimico suo Ciceroni pepercit:

Er. Etiam parceret Catoni.

Vel

Vel si visum fuerit ad formam Categoricam reducere, ita formari poterit.

Qui inimico suo Ciceroni pepercit, parcat etiam Catoni:

Sed *Cæsar* inimico seu Ciceroni pepercit:

Er. Etiam parcat Catoni.

ARTICULUS Septimus

De Dilemmate.

Dilemma dicitur Argumentandi formula, in qua facta membrorum distinctione, difficultate premitur adversarius quamcunque partem elegerit, unde et dici solet Argumentum *Cornutum*, sive *Bicorne*, ut in exemplo sequente.

Si impium perpetraveris facinus, vel id magistratui innotescet, vel non innotescet:

Si magistratui innotuerit, poenas dabis in hac vita; si non innotuerit, intus utcunque mordente Conscientia cruciaberis:

Er. Ab impio facinore perpetrando omnino est abstinendum.

Vel,

Er. Impium facinus non est perpetrandum.

In hujusmodi Argumentationibus, ut rite inferatur Conclusio, hæc requiri solent; *primo*, Ut in propositione Majore sit plena partium enumeratio, et inter has oppositio debita, ne membrum aliquod medium, aut diversum reperiatur. *Secundo*, Ut sit difficultas tanta ex utraque parte (addas, si visum fuerit, vel ex partibus singulis, si plures fuerint duabus) ut inde necessario sequatur Conclusio. *Tertio*, Cavendum ne in opponentem æqua ratione retorqueri possit *Dilemma*, si qua vis in ipsa fuerit.

Dilemma reducere solent Logici non veteres tantum, sed et Recentiores, ad syllogismum Disjunctivum, qua in re non satis advertisse videntur, unanimi Consensu ab ipsis receptum esse tanquam Legitimum modum illum procedendi in syllogismo Disjunctivo, a remotione unius vel plurium membrorum ad positionem alterius, vel residui membri, disjunctivam saltem positionem plurium membrorum.

A Logicis item Veteribus probari modum procedendi alterum, licet (ut superius dictum, dum de syllogismo Disjunctivo) minime accuratum, a positione scil. partis unius ad negationem alterius, vel reliquarum; in Dilemmate autem, ut cuivis intentius rem perpendenti patebit, neuter ex modis his procedendi reperitur, removetur quippe in propositione minore utrumque membrum, vel omnia, si plura fuerint duobus.

Rectius multo reduci posse videtur Dilemma ad syllogismum Hypotheticum (nisi quod Dilemmatis propositio minor Epichyrema sapiat) Constantem Consequente Disjunctivo, cujus utrumque membrum (vel omnia, si plura fuerint Duobus) in minore removetur, ut hinc in Conclusionem procedatur ad remotionem antecedentis; prout cernere est in modo allato Dilemmate, si ad formam sequentem reducatur.

Si ex ulla suppositione perpetrandum sit impium facinus, vel hoc fiet ex suppositione quod magistratui innotescat, vel quod non innotescat.

Sed nec est perpetrandum impium facinus ex suppositione quod magistratui innotescat, nec quod non innotescat:

Er.

Er. Ex nulla suppositione perpetrandum est
impium facinus.

Ubi patet in minore removeri propositionis
majoris Consequens disjunctivum, quoad u-
tramque partem; atque ideo in Conclusionem re-
moveri majoris Hypotheticæ Antecedens.

Diximus Dilemmatis propositionem minorem
Epichyrema sapere (nec hoc impedit quo mi-
nus ad syllogismum Hypotheticum recte redu-
catur) quod in minore, ad vitandam syllogis-
morum pluralitatem, immediate subjiciatur ut-
riusque partis probatio: hoc ulterius patebit, si
prædicti Dilemmatis Minor, quoad probationem
in eadem propositione utrique parti annexam,
ad sequentes duos syllogismos Categoricalos re-
ducatur.

Primum.

Quod pœnam in hac vita infert non est per-
petrandum:

Sed facinus impium, ex suppositione quod
magistratui innotuerit, pœnam in hac vita
infert:

Er. Facinus impium, ex suppositione quod
magistratui innotuerit, non est perpetr-
andum.

Secundum.

Quod infert cruciatus mordentis Conscientiæ
non est perpetrandum:

Sed facinus impium, ex suppositione quod
magistratui non innotuerit, infert Cruci-
atus mordentis Conscientiæ:

Er. Facinus impium, ex suppositione quod
magistratui non innotuerit, non est per-
petrandum,

ARTICULUS Octavus

De Sorite.

Sorites dicitur Argumentandi Formula, in qua continua propositionum serie prædicatum propositionis primæ fit subiectum secundæ, prædicatum secundæ subiectum tertiæ, prædicatum tertiæ subiectum quartæ, et sic deinceps quoad de primo subiecto enunciatur ultimum prædicatum, ut in Exemplo sequente.

Avari multa Concupiscunt:

Qui multa Concupiscunt multis indigent:

Qui multis indigent anxia Cruciantur cura;

Qui anxia Cruciantur cura sunt miseri:

Er. A primo ad ultimum, avari sunt miseri.

*Non aliud est Sorites quam syllogismorum pluri-
um quasi in unum Coacervatio; et si qua argu-
mentandi formula syllogismus Compositus, sensu
etiam strictissimo, dici debeat, nomen certe
meretur formula hæc.*

*Quot autem syllogismi simplices in quavis
Sorite contineantur dignosci poterit ex Termini-
norum numero: numerum hunc constituunt
Termini, qui inter primum subiectum et ultimum
prædicatum interjacent: unde in modo allata
Sorite, pro numero Terminorum interjacentium,
nimirum multa Concupiscentes, multis Indigen-
tes, anxia Cruciatu cura, tres continentur syl-
logismi simplices, qui hunc in modum formari
poterunt.*

Primus.

Primus.

Qui multa Concupiscunt, multis indigent :
 Avari multa Concupiscunt :
 Er. Avari multis indigent.

Secundus.

Qui multis indigent, anxia Cruciantur cura :
 Qui multa Concupiscunt, multis indigent :
 Er. Qui multa Concupiscunt, anxia Cruciantur cura.

Tertius.

Qui anxia Cruciantur cura, sunt miseri :
 Qui multis indigent, anxia cruciantur cura :
 Er. Qui multis indigent, sunt miseri.

ARTICULUS Nonus

De Epichyremate.

Diximus superius prædictis Argumentandi Formulis addi a nonnullis *Epichyrema*, dictum a quibusdam *sylogismum Rhetoricum*, quod, quantumvis frequens sit apud Oratores, in Dissertationibus Philosophicis vix unquam occurrat.

Hujus nomine intelligunt *Argumentandi formulam*, in qua alteri vel utrique præmissæ *sylogisticæ immediate* subjungitur ipsius probatio ; ut in sequente Exemplo.

Omnis Homo tenetur actiones suas componere ad supremi Numinis præscriptum :
 quia est Homo Creatura ratione prædita :
 Sed omnis Imperator in hisce terris est Homo :
 quia

quia a Communi stirpe Adami Originem ducit:

Er. Omnis Imperator in hisce terris tenetur actiones suas componere ad supremi Numinis præscriptum.

Sicut de Sorite, ita de Epichyremate statuendum, sensu strictissimo, merito ipsi tribui nomen syllogismi Compositi; quod, ut abunde patet, in syllogismos alios sit resolubilis; ita si perpendatur modo allatum Epichyrema, facile quis cernet resolvi posse in syllogismos tres, quorum primus, si visum fuerit, dicatur Principalis: secundus involvitur in probatione propositioni majori annexa: Tertius, in probatione quæ minori annectitur: ita autem formari possunt tres hi syllogismi.

Primus.

Omnis Homo tenetur actiones suas componere ad supremi Numinis præscriptum:

Omnis Imperator in hisce terris est Homo:

Er. Omnis Imperator in hisce terris tenetur actiones suas componere ad supremi Numinis præscriptum.

Secundus.

Omnis Creatura ratione prædita tenetur actiones suas componere ad supremi Numinis præscriptum:

Omnis Homo est Creatura ratione prædita:

Er. Omnis Homo tenetur Actiones suas componere ad supremi Numinis præscriptum.

Tertius.

Tertius.

Quicumque originem suam ducit a communi stirpe Adami, est Homo:

Omnis Imperator in hisce terris originem suam ducit a communi stirpe Adami:

Er. Omnis Imperator in hisce terris est Homo.

H

A P.

APPENDIX.

De Argumentationibus Vitiosis.

ARgumentationes quædam syllogismorum speciem mentiuntur, dum interea veri syllogismi non sunt, in regulas utpote syllogisticas peccantes; dici solent hæ *sophismata*, ubi vitium obvium non est; horum species omnes a Logicis communiter enumeratas percurrere prohibet Compendioli hujus institutum; Tyronum utcunque gratia, syllogismorum falso ita Dictorum, in regulas syllogisticas peccantium, instantias nonnullas adducemus; ut horum vitiis detectis facilius detegantur aliorum istiusmodi, sicubi occurrant.

Regulas syllogismorum Generales *septem* superius adduximus, quarum dici possunt quædam *Primariæ*, quod ex ipsis tanquam Confectariæ aliæ ducantur, singularum etiam figurarum regulas sibi proprias, speciales dictas, adduximus: argumentationum cum in illas, tum in has peccantium, Instantiæ sequuntur.

In regulam quam assignavimus *primam* Generalem (in syllogismo poni debent tres Termini, nec plures, nec pauciores) peccat sequens Exemplum.

Omne Brutum est quid diversum ab Homine:
 Petrus non est quid diversum ab Homine;
 Er. Petrus non est quid diversum a Bruto.

Constat quippe quatuor Terminis, scilicet
 Brutum, Quid diversum ab Homine, Petrus,
 et Quid diversum a Bruto.

Observandum item in Regulam hanc Generale
 non tantum peccare syllogismos (modo
 ita dici mereantur) in quibus quatuor Termini
 expressis verbis reperiuntur diversi; sed et
 ubi ob Terminorum ambiguitatem uni ex tribus
 terminis Idem diversæ sunt alligatæ: unde fit
 quod in propositione una diverso sumatur sensu
 Terminus Idem ab eo, qui ipsi affixus fuerat in
 propositione alia, ut in Exemplo sequente.

Quod caret Principio et fine est æternum:
 Globus caret Principio et fine:
 Er. Globus est æternus.

In hoc enim æque hac priore sunt revera Termini
 quatuor: in propositione quippe maiore
 Intelligitur Principium et finis respectu durationis;
 in minore autem respectu Figuræ; unde
 enumerari facile possunt Termini quatuor. *Primo*,
 Carens principio et fine respectu durationis:
Secundo, Æternum: *Tertio*, Globus. *Quarto*,
 Carens principio et fine Figuræ.

Eadem etiam opera facile solvi possunt quæ
 communiter afferuntur sophismatum Exempla,
 ab ambigua Terminorum Constructione, a fallacia,
 ut dicitur, Compositionis et Divisionis; ab
 accentu item, et Figura Dictionis; sed his
 immorari impræsentiarum non vacat.

In Regulam *secundam* Generalem (medius Terminus debet semel saltem sumi in tota ipsius Extensione) peccat hic.

Aliquod animal est ratione destitutum :

Omnis Homo est animal :

Er. Omnis Homo est ratione destitutus.

Terminus enim Animal, qui loco medii ponitur, sumitur particulariter non tantum in Majore, quod patet, sed et in Minore, quod fit in ea prædicatum propositionis affirmantis, adeoque, ut ex alibi dicendis patebit, sumatur in parte tantum suæ Extensionis, ea scilicet quæ est proportionata Extensioni subjecti.

In Regulam *tertiam* Generalem (Termini Conclusionis universalis sumi non debent in ipsa Conclusionem, &c.) peccat hic.

Omnis sincere pius est beatus :

Aliquis miles est sincere pius :

Er. Omnis miles est beatus.

Terminus quippe miles, qui est minus Extremum, sumitur in Minore tantum particulariter, sive in parte tantum suæ Extensionis; universaliter autem in Conclusionem, subjectum utpote propositionis universalis.

In Regulam *quartam* Generalem (Debet altera saltem præmissarum esse affirmativa) peccat hic.

Rex Hybernæ non est Rex Danorum :

Rex Magnæ Britannæ non est Rex Danorum :

Er. Rex Magnæ Britannæ non est Rex Hybernæ.

Cumque nec ex utraque præmissa negativa inferri possit Conclusio affirmans: hic etiam in datam regulam peccat.

Rex Hispanorum non est Rex Danorum:
Rex Gallorum non est Rex Danorum:
Er. Rex Gallorum est Rex Hispanorum.

Ubi enim est præmissa utraque negativa, deest omne fundamen, cui inniti potest syllogismus; ut ex alibi dicendis patebit.

In Regulam *quintam* Generalem (si utraque præmissa fuerit affirmativa, &c.) peccat hic.

Omne peccatum reddit peccatorem iræ divinæ obnoxium:

Omne mendacium est peccatum:

Er. Mendacium non reddit peccatorem iræ divinæ obnoxium.

Cuius quippe perpendenti, ex modo dictis præmissis plane sequitur Conclusio.

Er. Omne mendacium reddit peccatorem iræ divinæ obnoxium.

In Regulæ *sextæ* generalis (Conclusio sequitur debiliorem partem) partem priorem (si altera præmissarum fuerit negativa, &c.) peccat hic.

Nullus Homo omnia potest:

Omnis Homo est creatura:

Er. Aliqua creatura omnia potest.

In ejusdem regulæ partem posteriorem (si altera præmissarum fuerit particularis, &c.) peccat hic.

Omnis Homo est Creatura ratione prædita :

Aliquod animal est Homo :

Er. Omne animal est Creatura ratione prædita.

In Regulam *septimam* Generalem (ex utraque præmissa particulari nihil sequitur, nec sc. Conclusio affirmativa nec negativa) peccat hic, cujus est Conclusio affirmativa.

Aliquod animal est Brutum :

Aliquod animal est Homo :

Er. Aliquis Homo est Brutum :

Hic etiam cujus Conclusio est negativa.

Aliqua substantia est cogitativa :

Aliqua substantia non est spiritus :

Er. Aliquis spiritus non est cogitativus.

Diximus superius ex æquo primarias non esse regulas has omnes Generales, unde nec mirum videri debet quod in earum plures peccat eadem Argumentatio vitiosa.

Sequuntur addenda exempla Argumentationum vitiosarum in Figurarum regulas speciales peccantium.

In Figuræ *primæ* regulam specialem primam (Minor debet esse affirmativa) peccat hic ideo vitiosus syllogismus.

Omnis spiritus est substantia ;

Nullum Corpus est spiritus :

Er. Nullum Corpus est substantia.

Hoc item sophisma vulgatum.

Tu non es quod Ego sum :

Ego sum Homo :

Ergo tu non es Homo.

De cujus solutione dabitur, volente Deo, occasio alibi fufius dicendi; fufficiat Impreſentiarum ad veram formam reduxiſſe, ut inde appareat quantum a regula hac ſpeciali deſlectat.

Ego ſum Homo :
Tu non es Ego :
Ergo tu non es Homo.

In Figuræ ejusdem regulam ſpecialem ſecundam (Major debet eſſe univerſalis) peccat hic.

Aliqua ſubſtantia eſt cogitativa :
Omne Corpus eſt ſubſtantia :
Er. Aliquod Corpus eſt cogitativum.

In Figuræ ſecunda regulam primam ſpecialem (Altera præmiſſarum debet eſſe negativa) peccat hic.

Omnis ſpiritus eſt ſubſtantia :
Omne Corpus eſt ſubſtantia :
Er. Omne Corpus eſt ſpiritus.

In regulam hanc peccat etiam ſophiſma iſtud vulgatum.

Qui dicit hanc Theſin eſſe propoſitionem, dicit verum :

Sed qui dicit hanc Theſin eſſe Theſin falſam, dicit hanc Theſin eſſe propoſitionem :

Er. Qui dicit hanc Theſin eſſe Theſin falſam, dicit verum.

De cujus ſolutione fufius alibi dicitur; hic tantum perpendendus venit trium iſtarum propoſitionum

positionum sensus, cujus, in Argumentatione omni, præcipua est habenda ratio; huc autem quod ad sensum redeunt.

Thesis falsa est propositio :

Hæc Thesis est propositio :

Ergo hæc Thesis est Thesis falsa.

In Figuræ ejusdem regulam specialem secundam, (Major debet esse universalis) peccat hic.

Aliqua substantia est in partes Divisibilis :

Nullus spiritus est in partes Divisibilis :

Er. Nullus spiritus est substantia.

In Figuræ tertiæ regulam primam specialem (Minor debet esse affirmativa) peccat hic.

Omnis spiritus est substantia :

Nullus spiritus est Corpus :

Er. Aliquod Corpus non est substantia.

In Figuræ ejusdem regulam specialem secundam (Conclusio debet esse particularis) peccat hic.

Omnis Homo habet mentem finitam Corpori organico unitam :

Omnis Homo est animal :

Er. Omne animal habet mentem finitam Corpori organico unitam.

APPENDIX *Alter a*

De Legibus Disputandi.

GENUINUS, in quem intendi debet Disputatio, finis est, ut monstretur veritas, et falsitas refellatur: hujus Leges nonnullæ tradi solent, quarum, quantum ad Disputationis materiam, præcipuæ sunt sequentes duæ.

Prima, Ut instituatur Disputatio de materia illius naturæ, quæ (in rebus, quæ humano generi usui esse poterunt) veritatibus detegendis ac confirmandis, ac erroribus refutandis, inserviat.

Secunda, Ea est Eligenda materia, quæ Disputantium captum non excedat, quæque a quibusdam saltem in Dubium vocabitur; quæ enim a nemine in Dubium vocantur, extra Controversiæ aleam poni intelliguntur.

Quod ad Disputationis formam (disputandi methodum) tradi solent Regulæ quædam, ab Opponente, simul et Respondente (Defendente etiam dicto) observandæ: Aliæ item illi, et aliæ huic peculiæ.

Utrique incumbit,

Primo, Ut ingenuæ mentis candore imbutus ad Disputationem uterque accedat, eruendam veritatem intendat, nec vanam Gloriam captare studeat.

Secundo, Ut per integrum Disputationis decursum, eundem controversiæ statum, in Disputationis initio distincte propositum, firmiter uterque retineat.

Tertio, Ad inanem litem tollendam, de principiis quibusdam, quibus inædificanda veniunt Argumenta, in antecessum inter eos convenire debet.

Quarto, Ut brevitati simul et perspicuitati uterque studeat.

Quinto, Ut ab omni contumeliarum genere utrique absteineatur.

Regulæ ab Opponente peculiariter observandæ, sunt,

Prima, Ut propositæ Theseos sensum accurate examinet.

Secunda, Ut quod assert argumentum primum propositæ Thesi expresse contradicat.

Tertia, Ut in Disputationis progressu Argumentationem ita firmandam curet, ut sequentis Argumenti Conclusio sit hæc (propositio eadem, quæ prius a Respondente negata fuerit : Sique a Respondente adhibita fuerit

Distinctio

Distinctio sensus ambigui, sequentis Argumenti Conclusio sit propositio illa, quam, addito Distinctionis altero membro, respondens admittendam renuerat.

Quarta, Ubi data fuerit a Respondente solutio, propositi Argumenti vim plane tollens, ulteriori altercationi ne indulgeat.

Regulæ a Respondente peculiariter observandæ, sunt,

Prima, Ut præmissis, prout usus fuerit, honoris vel benevolentiae titulo, Argumentum ab Opponente adductum fideliter integrum repetat, denuo item recitet, quoad ab ipso repetita iterum fuerit propositio illa cui responsionem dare instituit.

Secunda, Ut inter repetendum argumentum, si primum fuerit, ab Oponente adductum, perpendat an Thesi propositæ contradicat; sique primum non fuerit, examinet an argumenti istius Conclusio sit eadem propositio, quam prius negaverat, vel simpliciter, vel addito Distinctionis altero membro.

Tertia, Ubi nihil horum occurrit, argumenti formam, secundum regulas superius traditas, examinet; hæc si accurata non fuerit, argumentum repudiet, ubi illius vitium, quod ad formam, ostenderit.

Quarta, Si accurata reperiatur forma, præmissas perpendat, falsam neget, ambiguam distinguat.

Quinta, Si non tantum accurata fuerit argumenti forma, sed et de præmissarum veritate constet absque ulteriore lite, quod verum est, agnoscat.

Sexta, Ubi sub Doctoris præsidio in arenam prodeunt Opponens et Respondens, regulas, sicubi opus fuerit, alias a Præside tradendas, uterque observet.



F I N I S